

den olderluden achteyn Honoversche penninge vor win, oblaten — — — — to settende; derjenner del, de dar nicht komen, schal men geven armen luden.

Desse benomeden memorien — — — — user leven Vrouwen und upp der Nyenstad vorben. scholen bestellen und don wij testamentarii de wile unser jenich leved, und na unser aller dode de vicarii sunte Bertolomei und Berwardi altare vorben., und wij testamentere bij unsem nnd unser yewelkes levende und na usem dode de vicarii, beide tosamende, schullen hebben und beholden ene Lub. mark van der renthe viff mark vorben. vor ere arbeit; und in alle dissen memorien und godesdenste schal men vlitliken bidden to Gode vor her Hinrike Notberges zele, sines vaders, siner moder und vor alle de sele, de ute sinem slechte sin vorstorven, und vor alle Cristene zele.

Wanner ok de rad to Honovere de lose vorkundigen und de summen wedder uthgevende werden, so schullen wij und na unsem dode de vicarii der erben. sunte Bartolomei und Berwardi altare de summen wedder in renthe und gulde beleggen na rade der twyer heren to Mandeslo, des kerkheren upp der Nyenstad und des eldesten vicarii to unser Vrouwen in dem lene mangk den residenten, also dat de summe blive bij den memorien und in der wise, also vorscreven is, edder also men dat vorderst enden mach.

Worde sek ok denne de renthe vormynnernde, dat scholen de vorben. alle like lyden an afflage malkes dele na enes yewelken antale.

Desse schickinge und lesten willen wille wij testamentere alle vorben. also vorscreven is gehalten hebben, und des to tuchnisse hebbe wij alle unse ingesegele gehenget an dissen bref.

Geven na Godes bort verteynhundert yar, darna in dem acht unde dortigesten yare, in sunte Gorgonii daghe.

Original (etwas beschädigt) auf Pergament mit den anhangenden 4 Siegeln.